

4. En relación ás persoas autorizadas de cada entidade avalista para levar a cabo este procedemento, deberán ser dados de alta como usuarios rexistrados no Centro Informático para a Xestión Tributaria, Económico-Financeira e Contable (CIXTEC), para o que terán que dispor de poder bastante para actuar en nome da citada entidade e acompañar verificación da suficiencia dos seus poderes, corroborados pola Aseoría Xurídica da Xunta de Galicia.

O usuario que vai asinar a presentación disporá dun certificado dixital outorgado pola Fábrica Nacional de Moeda e Timbre, ou daquelas autoridades que sexan admitidas pola Consellería de Economía e Facenda.

Artigo 5º.-Xustificantes e o seu contido.

1. Neste procedemento o acto de presentación e constitución da garantía efectúase no mesmo momento, de xeito que, feita a presentación pola entidade avalista, a aplicación informática xerará o resguardo de constitución da garantía en aval (modelo 790), como xustificante con efectos acreditativos. Constará de dous exemplares de igual contido, un para o interesado e outro para presentar ante o órgano, organismo autónomo ou entidade pública dependente ou vinculada á Comunidade Autónoma a cuxa disposición se constitúe a garantía.

2. No resguardo de constitución constará a seguinte información:

- a) Identificación da entidade avalista.
- b) Identificación da persoa ou entidade garantida.
- c) Norma que impón a constitución da garantía.
- d) Órgano administrativo, organismo autónomo ou ente público dependente ou vinculado á Comunidade Autónoma a cuxa disposición se constitúe a garantía.
- e) Obriga garantida.
- f) Importe da garantía (en cifra e letra).
- g) Data de constitución.
- h) Número do rexistro especial de avais.

3. Así mesmo, no momento da presentación, a aplicación xerará dous documentos de aval, de igual contido dos que dispón a Caixa Xeral de Depósitos, un para a entidade avalista e outra para o interesado, coas características que se establecen nos artigos 15 e 17 do Real decreto 161/1997, do 7 de febreiro, e na Orde do 7 de xaneiro de 2000.

Este documento de aval será válido e producirá efectos desde a data de constitución da garantía e será título executable, nos termos legalmente previstos.

4. Para efectos da garantía e de cumprimento dos prazos de que dispón o interesado, a data de constitución será a da presentación telemática.

5. O resguardo de constitución da garantía (modelo 790) e o documento de aval, xerados pola aplicación informática, conterán ao pé un código seguro de verificación, que lle permite ao órgano, organismo autónomo ou ente público dependente ou vinculado a

Comunidade Autónoma comprobar en calquera momento a súa validez e vixencia, a través da oficina virtual da Consellería de Economía e Facenda.

Artigo 6º.-Cancelación e devolución da garantía.

A cancelación e devolución da garantía efectuarase de acordo coa lexislación vixente, da seguinte forma:

1. Unha vez que a Caixa de Depósitos recibiu, por escrito, do órgano administrativo, organismo autónomo ou entidade pública dependente ou vinculada á Comunidade Autónoma á disposición do cal se constituíu a garantía, o acordo de cancelación, ben directamente ou ben por medio do interesado, procederá a dar de baixa a garantía nos seus rexistros.

2. Completada a baixa da garantía, a Caixa de Depósitos efectuará unha comunicación, por medios electrónicos, á entidade avalista indicando tal incidencia, de modo que esta xa pode acceder á aplicación a través da oficina virtual da Consellería de Economía e Facenda para comprobar e imprimir un xustificante da cancelación, con efectos de devolución.

Disposicións derradeiras

Primeira.-Facúltase o director xeral de Política Financeira e Tesouro para ditar cantas instrucións sexan necesarias para a execución desta orde.

Segunda.-Esta orde entrará en vigor aos vinte días seguintes ao da súa publicación no *Diario Oficial de Galicia*.

Santiago de Compostela, 23 de maio de 2008.

José Ramón Fernández Antonio
Conselleiro de Economía e Facenda

**CONSELLERÍA DE INNOVACIÓN
E INDUSTRIA**

Corrección de erros.-Orde do 28 de abril de 2008 pola que se establecen as bases reguladoras para a concesión de subvencións a pequenas e medianas empresas galegas para apoiar as accións de implantación e certificación de modelos de xestión e a elaboración e verificación de memorias de responsabilidade social empresarial, así como para a selección de entidades colaboradoras que participarán na xestión delas, e se procede á súa convocatoria (procedemento IN514B).

Advertidos erros na Orde do 28 de abril de 2008, pola que se establecen as bases reguladoras para a concesión de subvencións a pequenas e medianas empresas galegas para apoiar as accións de implantación e certificación de modelos de xestión e a elaboración e verificación de memorias de responsabilidade social empresarial, así como para a selección de entidades colaboradoras que participarán na súa xestión, e se procede á súa convocatoria (procede-

mento IN514B), publicada no DOG nº 8, do 8 de maio de 2008, cómpre realizar as seguintes correccións:

Na páxina 8.275 no anexo A, Referenciais subvencionables, deben engadirse os seguintes referenciais:

Especificación	Descrición
UNE 183001	Aloxamentos rurais. Requisitos para a prestación do servizo.
UNE 184001	Cámpings e cidades de vacacións. Requisitos para a prestación do servizo.
UNE 186001	Establecementos balnearios. Requisitos para a prestación do servizo.
UNE 188001	Campos de golf. Requisitos para a prestación do servizo.
UNE 188002	Estacións de esquí e montaña. Requisitos para a prestación do servizo.
UNE 189001	Servizos turísticos de intermediación. Requisitos para a prestación do servizo.
Serie de normas UNE 167000	Servizos de restauración.

Orde do 27 de maio de 2008 pola que se abre un novo prazo de presentación das solicitudes e se modifica a máxima porcentaxe subvencionable dos equipos que se acollan ao abeiro da Orde do 4 de marzo de 2008 pola que se establecen as bases reguladoras para a concesión de axudas en réxime de concorrència competitiva, das subvencións para a substitución de guindastres-torre desmontables para obras na Comunidade Autónoma de Galicia no ano 2008 (IN420A).

A Consellería de Innovación e Industria ditou a Orde do 4 de marzo de 2008 pola que se establecen as bases reguladoras para a concesión de axudas en réxime de concorrència competitiva, das subvencións para a substitución de guindastres-torre desmontables para obras na Comunidade Autónoma de Galicia (*Diario Oficial de Galicia* nº 52, do 13 de marzo).

Na citada disposición establécese que o prazo de presentación das solicitudes será dun mes contado a partir do día seguinte ao da publicación desta orde no *Diario Oficial de Galicia*, así como que a contía máxima da subvención neta equivalente poderá alcanzar ata o 20% do custo do investimento subvencionable.

Tendo en conta a desaceleración que está a sufrir o sector da construción, na súa actividade produtiva considérase necesario abrir un novo prazo de presentación de solicitudes, así como o incremento da contía máxima do investimento subvencionable.

En consecuencia, en uso das atribucións que me foron conferidas,

DISPOÑO:

Artigo único.-Abrir un novo prazo para a presentación das solicitudes, que será dun mes contado a

a partir do día seguinte ao da publicación desta orde no *Diario Oficial de Galicia*, así como a contía máxima da subvención neta equivalente, que poderá alcanzar ata o 40% do custo do investimento subvencionable, a cal se aplicará a todos os beneficiarios, tanto aos que solicitaron a axuda no primeiro prazo de presentación das solicitudes, como aos que presenten neste novo prazo.

Para todo o non previsto nesta orde, atenderase ás bases reguladoras e a convocatoria da Orde do 4 de marzo de 2008, polo que se establecen as bases reguladoras para a concesión, en réxime de concorrència competitiva, das subvencións para a substitución de guindastres-torre desmontables na Comunidade Autónoma de Galicia no ano 2008 (DOG nº 52, do 13 de marzo).

Santiago de Compostela, 27 de maio de 2008.

Fernando Xabier Blanco Álvarez
Conselleiro de Innovación e Industria

CONSELLERÍA DE SANIDADE

Orde do 27 de maio de 2008 pola que se establecen as bases reguladoras e se convocan axudas en réxime de concorrència competitiva ás entidades privadas sen ánimo de lucro para a realización de programas de prevención do alcoholismo.

De conformidade co Decreto 45/2006, do 23 de febreiro, polo que se establece a estrutura orgánica da Consellería de Sanidade, correspóndenlle a estas competencias en materia de sanidade, de acordo co Estatuto de autonomía para Galicia e nos termos sinalados pola Constitución española.

O Servizo Galego de Saúde, organismo autónomo de carácter administrativo, foi creado pola Lei 1/1989, do 2 de xaneiro, reformada pola Lei 8/1991, do 23 de xullo, e parcialmente derrogada pola Lei 7/2003, do 9 de decembro, salvo no relativo á súa creación, e está adscrito á Consellería de Sanidade. A estrutura orgánica do Servizo Galego de Saúde actualmente regúlase no Decreto 46/2006, do 23 de febreiro, e os seus fins e funcións regúlanse no capítulo I do título IV da devandita Lei 7/2003, do 9 de decembro.

O Decreto 389/1994, do 15 de decembro, polo que se regula a saúde mental en Galicia e o Plan estratéxico de saúde mental 2006-2011 teñen por obxecto establecer as directrices xerais de actuación na saúde mental e a asistencia psiquiátrica, a regulación dos dispositivos dirixidos á promoción e protección da saúde mental, a prevención das enfermidades psíquicas e a asistencia, rehabilitación e integración dos enfermos mentais.